

四庫全書

子部

欽定四庫全書

子部
山堂肆考卷四十七

詳校官中書臣孫溶

主事臣祁韻士覆勘

總校官降調編修臣倉聖脉

校對官主事臣陳墉

謄錄監生臣金拱閔

欽定四庫全書

山堂肆考卷四十七

明 彭大翼 撰

臣職

吏部尚書

歷代沿革此周禮天官冢宰之職也漢有選部尚書
魏改選部為吏部專掌選職右於諸曹尚書唐因隋
制吏部尚書掌文官選舉龍朔二年改為司列太常
伯咸亨初復舊光宅元年改為天官尚書神龍元年

復舊天寶十一載改為文部至德初復舊總判吏部
司封司勳考功四曹事宋朝典選之職分而為四文
選二曰審官東院曰流內銓武選二曰審官西院曰
三班院元豐定制以審官東院為尚書左選流內銓
為侍郎左選審官西院為尚書右選三班院為侍郎
右選掌文武官選授勳封考課之政令

掌建六典

周禮太宰之職掌建邦之六典以佐王治邦國

表率六曹

牋表類尚書總統百度是為古官吏部表率六曹茲為
重任

班序常尊

自漢及魏授此職者咸云吏部尚書若授諸曹尚書直
云尚書蓋此官班序常尊不與諸曹同也自魏至梁並
第三等梁定十八班班多者為貴吏部尚書班十四諸
曹尚書班十三

衣冠傾屬

梁書王泰山仲通能接人士人士願其居選官頃之為
吏部尚書衣冠無不傾屬

可談風月

梁徐勉為吏部尚書嘗與門人夜集客有虞曇求詹事
官勉正色曰今夕止可談風月不宜及公事時人服其
無私按虞曇集覽作虞高

但妨賞適

北齊陽休之為吏部尚書謂人曰此官實是清華但煩劇妨吾賞適

甄竒錄異

南史李肅字偉恭甄竒錄異薦拔後進題目品藻曲有條貫人以此服之及擢為選部尚書號稱得才

先德後才

隋書牛弘字里仁為吏部尚書其選舉先德行而後文才進用多稱職之吏

門閥不遺

齊書辛術為吏部尚書性尚貞明取士以才器循名責實新舊參舉管庫必擢門閥不遺按此齊乃東魏高洋也

餽餉無受

南史江湛為吏部尚書家甚貧不營私財饋餉盈門一無所受又晉鄧攸為吏部尚書牧馬於家庭妻息素食不受一錢

六燕一鴻

晉陸佃謝吏部尚書啟六燕相停試權衡其輕重乙鴻
遼遠欲審別其飛翔按九章美術五雀六燕飛集於衡
衡適平一雀一燕而異處則雀重而燕輕又張融曰鴻
飛天首遼遠難明楚人以為鳧越人以為鴻

丘山沔水

分紀唐李尚書又王尚書丘崔賓客沔掌吏部皆獲當
時推美人為之語曰李下無蹊徑又曰丘山岌岌連天

峻沔水澄澄澈底清

願選敦重

陳孔奐為吏部尚書太子叔寶欲以江總為太子詹事
奐曰江總有陳陸之才而無園綺之實太子深以為恨
乃自言於陳主將許之奐乃啟願選敦重之才以居輔
導按園綺謂東園公綺里季也

好抑文雅

唐戴胄檢校吏部尚書好抑文雅獎薦法吏時以寡學

為訾

周謹廉素

晉太康四年詔選曹銓管人才宜得忠恪寡欲抑華崇本者為之尚書朱整周謹廉素以道自居是其人也其以整為吏部尚書

清通簡要

劉義慶世說王濬冲裴叔則二人總角詣鍾士季須臾去後客問鍾曰向二童何如鍾曰裴楷清通王戎簡要

後二十年此二賢當為吏部尚書冀爾時天下無復滯才按濬冲王戎字叔則裴楷字士季鍾會字

官有定價

北史元暉遷吏部尚書專事納貨授官皆有定價大郡二千疋中郡一千小郡五百選人謂之市曹

門無私謁

唐崔洪為吏部尚書門無私謁

顏嗔謝笑

謝莊代顏峻為吏部尚書峻容貌嚴毅常有不可犯之色莊風姿溫美有喧訴者常歡笑答之時人語曰顏吏部嗔而與人官謝吏部笑而不與人官

閻口裴手

唐裴光庭為相兼吏部尚書時有門下主事閻麟之為光庭腹心吏部選官皆麟之裁見光庭隨而下筆時人語曰麟之口光庭手

加祿先呵

晉王弘自領選將加榮祿於人必先呵責然後施行若善相眄接必無所與人問其故答曰王爵既加於人又相撫勞便成與主分功若求者不與既無以為惠又不微借顏色即大成怨府

被召即拜

南史宋少帝即位以蔡廓為吏部尚書辭不拜乃以王德惠代之惠被召即拜未嘗接見賓客有與書求官者輒聚書閣上及去職其封如初時譚者以廓之不拜惠

之即拜事雖異而意同

各為題目

晉武帝泰始中以山濤為吏部尚書濤領吏部十有餘年每一官缺輒擇才資可為者啟擬數人各為題目而奏之時稱山公啟事

不署紙尾

宋武帝永初三年以蔡廓為吏部尚書廓謂傅亮曰選事若悉以見付不論不然不能拜也亮以語徐羨之美

之曰黃散以下悉以委蔡以上故宜共參同異廓曰我不能為徐干木署紙尾遂不拜注云選按黃紙錄尚書與吏部尚書連名時羨之為司空錄尚書故廓云然干木羨之小字也沈約曰廓豈不知選按同體義無偏斷乎良以主閣時難不欲居通塞之任遠矣哉黃散謂黃門散騎侍郎也

不棄大德

唐韋思謙舉進士補應城令歲餘調選思謙在官坐以

公事未叙進吏部尚書高季輔曰自居選部今始得此
一人豈以小疵而棄大德遂擢授監察御史

未退虛名

王隱晉書王戎為右僕射領吏部尚書自戎居選未嘗
進一寒素退一虛名理一冤枉隨時浮沉門調戶選

特用隱之

何法盛晉中興書吳隱之字處默少有孝行與太常韓
康伯鄰居隱之母亡每哭康伯母輒涕泣悲不自勝既

而語康伯曰汝後若居銓衡當用此人及康伯為吏部尚書特進用之遂歷清要

驚服漫漢

東魏以楊愔典選嘗以六十人為一甲愔令其自叙訖不省文簿便次第呼之無有悞者後有選人魯漫漢自言猥賤獨不見識愔曰卿前在元子思坊騎禿草驢經過見我不下以方麴障面我何以不識卿漫漢驚服

搖扇謂王

魏元順為吏部尚書時朱暉素事高陽王雍欲以為廷尉評頻煩託順順不為用雍撫几而怒順搖白羽扇徐謂雍曰高祖遷宅中土勅定九流官方清濁軌儀萬古而朱暉小人身為省吏何合為廷尉清官雍曰身為丞相錄尚書如何不得用一人為官順厲聲曰殿下必欲如是順當依事奏聞

舉扇掃客

齊書蕭子顯為吏部尚書負才氣見凡流賓客不與交

言但舉扇一揮而已衣冠切恨之

作九班制

晉劉頌字子雅為吏部尚書作九班之制以別尊卑為
裴願所駁

試三銓法

唐開元十三年吏部為十銓選舉至宣宗即位赦書曰
吏部三銓選士祇憑資考多匪實才許觀察使刺史有
奇才異能之士開薦試用三銓謂尚書銓及侍郎二人

分為中銓東銓也

遊處不雜

梁袁昂雅有人鑒遊處不雜及為吏部尚書梁帝曰齊明帝用卿為黑頭尚書朕用卿為白頭尚書

請託不隱

唐魏知古本起小吏姚崇薦之以至為相崇意輕之請知古出攝吏部尚書知東都選事崇二子分司東都有所請託知古歸悉以聞他日上問崇卿子何官才性何

如崇揣知上意對曰臣三子兩在東都為人多欲而不
謹是必以事干知古臣未及問之耳上問安從知之對
曰知古微時臣嘗卵而翼之臣子愚以為知古容其為
非故敢干之耳上于是以崇為無私而薄知古欲斥之
崇固請曰陛下赦臣子無狀已為萬幸苟遂知古累聖
政矣上許之竟罷為工部尚書

九品官人

魏陳羣為吏部尚書制九品官人之法

四等進人

宋李清臣為吏部尚書嘗取百餘人第為德行政事文學議論四等以進

執心平當

晉劉雄字公平遷吏部尚書執心平當無少私曲

居身清正

南齊褚玄為吏部尚書居身清正在選部門庭蕭索賓客罕至每出入左右常捧一黃紙帽風吹紙已殆盡

毛玠易俗

魏毛玠與崔琰並典選舉用皆清正之士由是天下士莫不以廉節自勵時有長吏還者垢面羸衣常乘柴車魏武嘗嘆曰孤之法不如毛尚書使吏部用心如玠風俗之易不難

巨源趨時

唐韋巨源為吏部尚書時要官缺執政欲以次用其親戚巨源秉筆當除十人皆宰相近屬楊再思曰吾等誠

負天下巨源曰時當爾耳

啓借鼓吹

梁蔡徵拜吏部尚書啓後主借用鼓吹答曰軍樂有功
乃授徵不自揆量紊亂朝章然其父景歷既有締構之
功宜如其啓

悉備儀注

隋書牛弘拜吏部尚書仁壽二年獻皇后崩王公以下
不能定其儀注楊素謂弘乃舊學時賢所仰今日之事

決在於公弘乃不拜讓斯須之間儀注悉備素嘆曰衣冠禮樂盡在此矣非吾所及也

作考課法

魏盧毓字子家為吏部尚書文帝詔選舉莫取有名者名如畫地作餅不可啖也毓對曰名不可以得異人而可以得常士常士興教慕善然後有名名非所當疾也今考績之法廢而以毀譽為進退故真偽混淆虛實相蒙帝納其言詔作考課法

用循資格

唐開元十八年以裴光庭兼吏部尚書先是選司法官
惟視其人之能否或不次超遷或老於下位有出身二
十年不得祿者光庭始奏用循資格無問能否選滿則
注非負譴者有升無降庸愚皆喜謂之聖書而才俊之
士無不怨嘆宋璟爭之不能得

李重著箴

晉李重字茂曾為吏部尚書著箴置之左右

李肩刊令

晉李肩字伯重為吏部尚書正身率職刊定選例而著於令

請禁驕恣

晉安帝隆安中會稽世子元顯以星變解錄尚書事復加尚書令吏部尚書車肩以元顯驕恣白會稽王道子請禁抑之元顯問道子曰車武子屏人言及何事道子怒曰爾欲幽我不令與朝士語耶元顯出謂其徒曰肩

間我父子盾懼自殺

不畏強禦

唐中宗景龍四年以宋璟為吏部尚書李乂盧從愿為侍郎皆不畏強禦請謁路絕人服其公

才如襪線

偽蜀吏部尚書韓昭琴棋書筭射法悉皆涉獵而不精朝士李台瑕曰韓八座技藝如拆襪線無一條長或作禮部尚書

法如權衡

宋王質字子野判吏部銓選號為稱職而選法未嘗更
易人或問之公曰選法備具如權衡在執者不欺其輕
重耳何必屢更

恐長奔競

宋元豐選法以薦者多寡為差元祐初孫永為吏部尚
書恐長奔競之風請改法不用薦之多寡而以到選先
後為次士論不平

請罷耗費

中興繁年錄吏部尚書張燾因召對上言甲庫萃工巧以蕩上心酤良醢以奪官課教坊樂工員數日增俸給賜賚耗費不貲皆可罷之上曰卿可謂責難於君矣明日罷甲庫諸局以酒庫歸有司減樂工數百人

搜揚俊乂

崔鴻春秋郭撫初為吏部尚書與侍郎姚範清心虛已搜揚俊乂內外稱之以郭姚擬崔毛

申達鬱滯

樓攻媿集汪大猷字仲嘉權吏部尚書或曰今日凡事從窄非曩時比公曰方且鄙之忍效尤乎調官者多孤寒之人於此不為留意使得其平尚謂之銓衡耶由是鬱者得伸滯者得達人人感悅

日月為斷

後魏崔亮為吏部尚書為停年格不問士之賢愚專以停解日月為斷亮甥劉景安以書規之亮不從

公忠為先

宋楊誠齋集葉顯權吏部尚書乾道九年召對便殿賜坐賜茶禮異他日帝曰吏部條例朕亦置一通在禁中又問卿當官以何者為先對曰以公忠為先帝曰卿宜無忘此二字後五日除簽書越二日兼叅政

却花練

陳姚察為吏部尚書有門生送南布一端花練一疋察曰所衣止是麻布蒲練此物於吾無用此人遜請察厲

色驅出

辭袖金

齊褚淵字彥回為吏部尚書有人求官袖中將金一餅
因求請間出金示之曰無人知者彥回不受曰自應得
官無假此物若必見與不得不相啟此人大懼收金去
立平作市井

語林袁貞為監軍范立平為吏部尚書坐中語袁曰卿
此選還不失護軍袁曰立平卿何事人中作市井

李又無蹊徑

見前丘山沔水

引致才名

東魏以高澄攝吏部尚書始改崔亮年勞之制銓擢賢能又沙汰尚書郎妙選人地以充之凡才名之士皆引致門下與之遊宴

過絕訛僞

唐鄭綱吏部尚書制國朝以來宋璟李又掌選部能過

絕訛偽振張紀綱

清公見美

梁張纘讓吏部尚書表漢革民曹魏仍東掾毛孝先以清公見美盧子若以貞固任職降及晉世希覩其人樂彥輔雍容自守當時恨其寡譽山巨源意在拔竒不免與世浮沉鄧攸牧馬家庭何益止競之操卞壺如含瓦石未聞檢裁之功

方嚴不侵

宋孝武帝好狎侮羣臣自太宰以下不免穢辱又寵一崑崙奴令以杖擊羣臣惟憚吏部尚書蔡興宗方嚴不敢侵媠儀曹郎王耽之曰蔡豫章昔在相府方嚴不狎武帝晏私之日未嘗相召蔡尚書今日可謂能負荷矣注云豫章興宗之父廓曾出為豫章太守

每招怨言

南北朝魏郭祚為吏部尚書持身清潔重惜官位至於銓授雖得其人徘徊久之然後下筆且云此人便已貴

六十一
卷四十七
矣故當時每招怨言然所用者無不稱職

多革弊政

宋汪應辰為吏部尚書剛方正直敢言不遜在朝多革
弊政中貴人側目孝宗時上皇方斲石池以水銀浮金
鳧魚於中帝過之上皇指示曰水銀正乏此買之汪尚
書家帝怒曰應辰力言朕建房廊與民爭利乃自販水
銀耶至是上疏論和糴事遂出知平江府然水銀實非
買應辰家也

時稱廉平

隋韋世康和靜謙恕為吏部尚書十餘年時稱廉平常
有止足之意謂子弟曰祿豈在多防滿則退年不待暮
有疾便辭因懇乞骸骨不許以為荊州總管

世憚剛嚴

宋晏敦復字景初權吏部尚書剛嚴為世所憚親戚故舊
有以書至視其封題有并及兩字者即却之不納惟務
抑僥倖清流品甄敘人物區別賢否一時銓總號稱平

允

首言朋黨

言行錄王存字正仲名為吏部尚書時在廷朋黨之論相熾公入對首言人臣朋黨誠不可長然或不察則濫及善人東漢朋黨之獄是也

諫屏鞠戲

陳正獻公俊卿名為吏部尚書時上未能屏鞠戲公上書力諫後入對上迎謂曰前日之奏備見忠謹朕決意

用卿矣

裁四選格法

宋晏敦復權吏部尚書中興以來凡四選格法多公所
裁定由是士無沉滯之嘆

編七司條例

楊誠齋集葉正簡公顯權吏部尚書時七司弊事未去
公乃與郎官編刻七司條例為一書或事同例異者存
其一削其一帝覽之御筆褒美令刻板頒下

為書示衆

陳以徐陵為吏部尚書陵以梁末以來選授多濫乃為書示衆曰永定之時聖朝草創白銀難得黃札易營致令員外常侍路上比肩誥議參軍市中無數今衣冠禮樂日富年華何可猶作舊意非理望也衆咸服之

具狀防吏

言行錄宋蘇頌判吏部尚書公前後掌天官四選凡五年每選人改官闕陞其磨勘吏洗垢求瑕故為稽滯公

敕吏曰某官緣某事當會某處仍引用合用條例及具委無漏落狀同上自是吏不得逞

吏部侍郎

歷代沿革周禮天官小宰漢之大夫即其任也隋煬帝三年尚書六曹各置侍郎一人以貳尚書之職唐武德初因隋舊置吏部尚書銓掌六品七品選侍郎銓掌八品九品選龍朔二年改為司列少常伯咸亨初改為吏部侍郎光宅初改為天官侍郎神龍初復

為吏部侍郎天寶十一載改為文部侍郎至德二載復為吏部侍郎本一員總章二年加一員以裴行儉為之本員為中銓新加員為東銓宋選人屬流內銓小使臣屬三班院元豐官制行以流內銓歸吏部侍郎左選以三班院歸吏部侍郎右選

大革前弊

唐宋璟為吏部侍郎先是外戚及公主干預朝政請託滋甚典選者為權門所制九流失敘士庶嗟怨至是公

大革前弊取舍平允銓司以清

悉改前規

唐姜晦開元中為吏部侍郎性聰悟識理體舊制吏曹舍宇悉布荆棘以防令史與選人交通及晦領選事盡除之大開銓門示無所禁私引置者晦輒知之召問莫不首伏初朝廷以晦改前規咸以為不可畢竟銓衡得所賄賂不行舉朝嘆服

不省私書

唐孔緯字孔文為吏部侍郎權要請託書盈几案竟不
之省

復除舊職

唐天官侍郎崔玄暉性介直絕請謁執政惡之改文
昌左丞月餘武則天謂曰聞卿改官令史設齋自慶此
欲盛為奸貪耳今還卿舊職復除天官侍郎

能知偽姓

唐會要天官郎中李知遠權知侍郎有選人姓刁又有

王元忠者並被放乃密與令史相知減其點畫刁改為丁王改為士擬授官後即添成文字知遠一覽便曰今年銓覆萬人總識姓名安有丁士姓者此必刁某王某也省內以為神明

皆給告身

五代劉岳唐明宗時為吏部侍郎故事吏部文武官告身皆輸硃膠紙軸錢然後給其品高有錢者則賜之其官卑而貧不能輸錢者往往但得其敕牒而無告身由

是受官者皆不知受命之所以然非王言所以告詔之意也請一切給之故百官皆給告身自岳始也

彥博寡術

唐溫彥博遷檢校吏部侍郎欲汰擇士類寡術不厭衆心訟牒盈庭時議頗譏之

高馮精鑒

唐高馮字季輔為吏部侍郎凡所銓綜時稱平允太宗賜金背鏡一面以表精鑒

賞異房杜

隋書吏部侍郎高孝基鑒賞機悟高邁絕倫房玄齡杜如晦與典選孝基特加賞異時以為知人

獎用孫張

王丘遷吏部侍郎典選號平允其獎用如孫逖張鏡微皆一時茂秀

熟于典故

李益能撰碁北海行狀碁北海先生宓禮當維揚兵革

之後省曹簿書殘毀幾盡公為吏部侍郎熟於典故衣冠調集及朝政沿革漫無成案可考公依據該審徐出一言以決之吏不得容其私公所建明悉著於令自是省曹除授皆有案驗

長於吏道

楊纂長於吏道所在皆有聲績除吏部侍郎前後典選十餘載時論稱為允當

甚有令譽

唐席豫字建侯為吏部侍郎玄宗謂曰卿前為考功職事平允故有此授豫典選六年甚有令譽

甚有能名

唐裴行儉馬載為吏部侍郎同時典選十餘年甚有能名時人稱為裴馬又盧從愿為吏部侍郎與李朝隱同時典選時人曰吏部前有裴馬後有盧李

不負朝廷

唐會要吏部侍郎鄭杲注韓思復為太常博士元希聲

金史紀事本末卷四十七
為京兆士曹嘗謂人曰今年掌選得韓元二子則吏部
不負朝廷矣

不畏彊禦

見吏部尚書

慰藉衰病

樓攻媿集宋趙粹中字大雅遷吏部侍郎愛惜名器持
心近厚有蜀士數人當改秩而吏以微文沮格累年公
立為申改有恩例得官而復衰病求赴銓司者公慰藉

周至竟與其官或問之荅曰一官姑以慰其蹉跎待次尚數年何忍沮之聞者感嘆

升擢孤寒

宋仁宗實錄陳堯咨判流內銓舊制選人皆用奏舉乃得改京寺官而士有孤寒不為人知者堯咨特為陳其功狀而升擢之

納金不受

唐韋夏卿萬年人為吏部侍郎從弟執誼在翰林受人

金有所干請密以金納夏卿懷中夏卿不受曰吾與汝
賴先人遺德致位及此顧當如是乎執誼大慙

非錢不行

鄭愔為吏部侍郎掌選賦污狼藉有選人繫百錢于鞋
帶愔問之對曰當今之選非錢不行

授邊遠官

唐崔鄆判吏部東銓文宗召三銓謂之曰卿等比選令
錄如何注擬鄆曰資序相當問以為治之術見可否而

擬之帝曰依資合得而才劣者何授對曰與邊遠慢官
帝曰以不肖之才治邊民則疾苦何知也朝廷遠近皆
願得人苟非其才人受其弊

便江嶺人

職官分紀唐興元初劉滋為吏部侍郎往洪州知選事
時言師興之後天下蝗旱穀價踊貴選人不得赴調乃
命滋江南典選以便江嶺之人時稱舉職

隨事䟽理

言行錄洪文安公遵字景嚴為吏部侍郎先是選人詣
曹改秩予奪一出吏手公乃隨事䟽理吏不得肆

隨到注擬

選舉志劉林甫唐貞觀初遷吏部侍郎初赴選者以十
一月為始至春即停選林甫奏請四時聽隨到注擬時
天下初定州府及詔使者多有赤牒授官至是停省來
集者將萬餘人林甫隨才銓擢咸得其宜時人以比隋
之高孝基

風神高邁

晉裴楷為吏部侍郎風神高邁容儀俊爽時謂之玉山照人

風采嚴正

唐韋陟為吏部侍郎選人多偽集與正調者相冒陟風采嚴正摘辨無不服者

遣決滯務

宋韓文惠公彥粹遷吏部侍郎右選公承積弊之後釐

正簿書遣決滯務增損廢置五萬四千一百餘事奏請
增置郎官一員因取當注之闕令大書而揭之門

裁定舛法

洪邁撰墓誌晏敦復為吏部侍郎掌右選改左選公久
典選事知吏部七司法多踈舛孜孜究心纖息參考奏
請裁定至今有司守之不能易也

專委令史

唐許子儒以學藝稱長壽中為天官侍郎居選部不以

藻鏡為急專委令史勾直為腹心注官之次但高枕而已由是補授失序無復綱紀道路以為口實

諫用優伶

樓攻媿集宋孫獻簡公逢吉字從之進吏部侍郎朱公熹之去公力救之侍郎彭公龜年補外又言不應為近習而逐正人一日會食部中或報王喜除閣門祇候公曰此乃優伶嘗於內庭效朱侍講容止以儒為戲者豈可以污清選當抗疏力爭否則於經筵論之由是飛語

上聞內批為郡

點頭更擬

唐蘇晉為吏部侍郎裴光庭為尚書有過官被却者就籍以朱點頭而已晉因榜選院曰門下點頭者更擬光庭以為侮已出為汝州刺史按集覽過官者凡選事侍郎以下三注三唱仍過門下省審之故為過官

厲色必容

苗晉卿知吏部選事性謙柔選人有訴訟索好官者雖

至數千言或聲色甚厲者必優容之拜吏部侍郎前後
典選五年政既寬弛吏胥因緣為奸賄賂大行

季卿襟懷

李季卿拜吏部侍郎在銓衡數年性識博達襟懷豁如
士人多附之

見素藻鑑

杜甫上韋見素詩持衡留藻鑑聽履上星辰注云見素
時為吏部侍郎銓衡平允上星辰言其親帝之旁也

吏部郎中

附員外

歷代沿革周官太宰之屬有下大夫即其任也秦有郎中以其為郎侍衛居中故云魏晉諸曹郎功高者遷吏部郎中歷代品級皆高於諸曹郎魏晉宋齊吏部郎品第五諸曹郎第六梁吏部郎品第四班第十

一隋煬帝改吏部郎為選部郎唐置吏部郎中二人龍朔二年改為司列大夫咸亨光宅神龍中並隨曹改復一人掌考天下文吏之班秩品命一人掌小選

未入仕而吏京司者復分九品通謂之行署其應選之人以未入九流故謂之流外銓宋元豐官制行置吏部郎中四人尚書選二人侍郎選各一人叅掌選事而分治之又周官太宰之屬有上士蓋吏部員外之任也後周一依周制隋文帝開皇中尚書省二十四司各置員外郎一人吏部置二人龍朔已隨曹改復又吏部郎中三廳先小銓次格式員外郎三廳先南曹次廢置舊說吏部員外郎為省眼

任尊

通典後漢鄭弘為僕射奏云臺職任尊而賞薄人無樂者故吏部郎中補二千石自弘之奏此始也

典劇

東漢吏部郎中典劇多超遷者

王戎穎悟

晉王戎少年穎悟二十四為吏部郎

劉鼎風稜

五代史劉鼎為吏部郎中性若寬易而典選曹務更有
風稜

追送出境

齊義興太守褚翔召為吏部郎去郡百姓老少追送出
境翔居小選素性公清不為請囑易意號稱平允

相送傾朝

何尚之字彥德遷吏部郎告休定省傾朝送別及至郡
父叔度謂曰聞汝來此傾朝相送果有幾客答曰殆數

百人叔度笑曰此是送吏部郎中耳非關何彥德也昔
殷浩作豫章亦嘗定省送別者甚衆及廢徙東陽船泊
征虜亭積日乃至親舊無敢相窺

徐寧清士

晉書褚亮每屬桓彝覓一佳吏部彝曰佳與縣宰徐寧
海岱清士即遷吏部郎寧晉人字安期

陸准正人

山公啟事吏部郎典碎事日夜相接非但當正已又當

能正人議郎杜點德履可嘉太子庶子崔諒中郎陸准
皆有意正人其次不審有可用者否

公議得失

魏諸葛誕亮兄也為吏部郎人有所屬輒顯其言而用
之後有當否則公議其得失以為褒貶自是羣僚皆慎
所舉

躬閱案牘

宋傅察為吏部郎選事最好煩劇在職者畫諾而已公

取案牘躬為省閱每至申刻方歸日以為常

果為此職

宋書顧憲之為吏部郎其祖凱之嘗為吏部於庭中列植嘉樹謂人曰吾為憲之植爾後果為此職

宜師此人

隋李德林為吏部郎陸昂命其子與德林周旋誡之曰汝每事宜師此人以為模楷

李肩廉平

晉書李胤為吏部郎銓綜廉平

胡銓直諒

周平園集胡銓諡忠簡入對乞修德以結人心練兵以觀虜釁上曰久知卿直諒拜吏部尚書左郎

選事克辦

後魏孝文帝欲革舊制選置百官謂羣臣曰為朕舉一人吏部郎既而曰朕得之矣乃徵崔亮為之亮叅選事垂二十年廉謹明決尚書曰非崔郎中選事不辦亮字

敬儒

部事無留

張文潛集晁補之字無咎為吏部郎中有嶺外尉獲盜
八人法當改官考功謂獲盜不同處曲沮其賞持之不
決尉客京久窘甚詣公訴之公為憫然一日當奏即為
上之七日得遷官於是吏胥畏服部無留事

斥華競

晉書李重遷吏部郎詢朝衆而斥華競存公平而塞私

謁

整風俗

山公啟事吏部郎主選舉宜得整風俗理人倫者為之
謝朓讓禮

杜佑通典齊依宋元嘉舊制其拜吏部郎有表讓之禮
齊謝朓除吏部郎上表三讓中書疑朓官未及讓以問
沈約約曰宋元嘉中范曄讓吏部三表及詔優答其事
宛然

桓彞顯名

晉桓彞遷吏部郎名顯朝廷

拔才舉能

王僧綽為吏部郎掌叅大選究識流品諳悉人物拔才

舉能咸得其分

剖疑析滯

唐席豫作楊吏部郎中碑銘序簿書以旌淑慝擇刀筆

以決臧否剖疑析滯揮翰如流選部以清繫公是賴

公綽先入

唐柳公綽與裴度俱為判官綽先入為吏部郎中度有詩餞別兩人同日事征西今日君先捧紫泥

杲之稍遷

齊書庾杲之字景行司空劉劭見而竒之曰見卿足使江漢崇望杞梓發聲稍遷吏部郎中叅選大事

列銓注法

選舉志唐吏部郎中裴行儉始設長名榜列銓注期限

等法又定州縣升降官資高下以為故事長名榜自此始也

有喉舌任

宋張績遷吏部郎中裴子野曰張吏部有喉舌之任已恨其晚

南曹

已下員外

唐六典吏部員外郎掌選院謂之南曹以其曹在銓曹之南故云

小選

唐百官志員外郎二人掌文選以三銓之法官天下之才其授試銓注與流內畧同謂之小選

無滯牒

唐裴遵度遷吏部員外郎專判南曹天寶中海內無事九沅輻輳會府每歲吏部選人盈萬遵度敏識強記視簿牒詳而不滯時稱吏事第一由是大知名

無留才

唐崔郾遷吏部員外郎每擬吏親挾格褒貶必當雖寒
遠無留才

諛騰無避

唐李朝隱為吏部員外郎時政出權倖不關兩省而內
受官但斜封其狀付中書即宣所司朝隱執罷千四百
員怨誹諛騰畧無避屈

判析有條

唐李栖筠遷吏部員外郎判南曹栖筠判析有條奸吏

奪氣號為神明

執筆閱書

唐劉禹錫撰韋公神道碑韋陟字商衡為吏部員外郎是曾在南宮為眉目在選士為司命公執筆閱簿書紛拏盤錯一瞬而剖

張幕設案

通鑑長篇宋紹興三十年以劉琪為吏部員外郎時苦吏為奸珙思有以制之一日命張幕設案置令式其中

使選集者得出入繙閱與吏折辨吏無得藏其巧人甚便之

不附相意

言行錄李殿撰浩字德遠為吏部員外郎宰相名同為郎者四人欲有所進用最屬意於公公不發一語明日同舍郎皆選公如故

論奪民財

宋楊誠齋集張栻名為吏部員外郎廟堂用史正志為

發運使奪州縣財賦遠近騷然棻為上言之上曰正志以為非取之民公對曰今州縣財賦大抵無餘不過巧為之名以取之於民耳上聞之矍然顧棻曰論此事者多矣未有能及此者如卿之言是朕假手於發運使以病吾民也閱實如棻言即詔罷之

山堂肆考卷四十七

欽定四庫全書

山堂肆考卷四十八

明 彭大翼 撰

臣職

司封郎中

附員外

歷代沿革舊主爵郎也北齊與隋並置主爵郎中唐
龍朔二年改司封大夫光宅元年改司封郎中開元
二十四年復為司封掌邦之封爵凡有九等宋設司
封判司事一人凡封爵之制一出於中書本司但掌

定謚先期戒本部赴集而已元豐官制行郎中員外
始實行本司事

執秩

左僖二十七年晉文公作執秩以正其官注云執秩主
爵秩之官也

典封

東漢馮勤為郎中給事尚書使典諸侯封事

號三列宿

見總郎中

掌九等爵

唐百官志司封郎中掌封命朝會賜予之級爵凡九等

心正

已下員外

唐柳公權為司封員外郎入奏帝曰見卿筆跡久矣因問用筆法權對曰心正則筆正乃可法矣上改容知其筆諫也

聲聞

唐楊凝為司封員外郎直聲彰聞

司勳郎中

歷代沿革周官有司勳上士二人凡有功者司勳詔之後周有司勳一人掌功勳之賞隋文帝司勳侍郎二人煬帝改為司勳郎唐武德初為司勳郎中龍朔元年改司勳大夫咸亨二年復舊掌邦國官人之勳級凡十有二等宋設司書無所掌元豐官制行郎中員外始實行本司事

主賞

周禮夏官司勲注云此官主封賞

等功

周禮司勲掌六卿賞地之法以等其功王功曰勲國功曰功民功曰庸事功曰勞治功曰力戰功曰多凡賞無常輕重臆功

請族蔡京

言行錄宋趙鼎為司勲郎中言自王安石用事肆為紛

更祖宗之法掃地而生民始病蔡京托名紹述盡祖安石之政以致大患今安石猶配享廟廷而京黨未族何以收人心而召和氣哉

不附秦檜

宋陳文正康伯字長卿自公為司勳郎中秦檜方擅事公乃澹然其中檜雖稱公靜重常超用他人而公獨不以介意在省五年始為軍器監

考功郎中

附員外

歷代沿革漢元帝時京房作考功課吏之法始有考
功之名光武改尚書三公曹主歲書考課以課諸州
郡至魏始有考功郎中宋齊並置功論郎中隋文帝
置考功侍郎煬帝改為考功郎唐武德初復為考功
郎中龍朔改為司績大夫咸亨初復舊掌内外文武
官吏之考課有四善二十七最宋設考功判司事一
人凡考課之法分隸他司本司但掌覆太常擬謚及
幕府州縣官流外較考之事而已元豐官制行郎中

員外始實行本司事又唐考功員外廳事有薛稷畫鶴宋之問為贊故謂為鶴廳

行賞先大勞

唐以陸贄為考功郎中辭曰行罰先貴近而後卑遠則令不犯行賞先卑遠而後貴近則功不遺望先錄大勞次徧羣品則臣亦不敢獨辭上不許

挾印赴行在

唐裴諝字士明遷考功郎中代宗幸陝諝徒步挾考功

南曹印赴行在上曰疾風知勁草果信

進絀清明

已下員外

唐席豫遷考功員外郎進絀清明拜吏部侍郎玄宗曰
卿在考功職詳事允故有今授

奏議詳雅

唐王仲舒字弘中有文名遷考功員外郎奏議詳雅省
中服其能

首選之問

唐宋之間善為五言詩當時無出其右者景龍中為考功郎中中宗增置修文館學擇其中文學之士宋之間與薛稷等皆首膺其選

遂拜蘇題

唐韓休作蘇題集序屬考功員外郎闕時中書令李嶠執筆曰考功郎非蘇君不可遂拜題為考功員外郎

不責細節

中興繫年錄考功員外郎魏矸字邦達時郎選案牘不

存吏緣為奸凡川陝官到部者多以微文沮抑往返輒
經年矸請細節不圓處悉先放行人以為便

恐傷雅道

唐貞觀中冀州進士張昌齡與王公瑾皆善屬文名振
京師考功員外郎王師旦知貢舉黜之及奏第上甚恠
之師旦曰二人雖有辭華然具體性輕薄終不成令器
若置之高第恐後進効之傷陛下雅道帝以為名言

請考簿不用朱

唐王徽轉考功員外郎時考簿上中下字俱朱書歲久
易漫吏緣為奸多有洗改徽白僕射請以墨奸欺遂絕
論賜謚不應法

東都事畧宋劉敞判尚書考功仁宗賜夏竦謚曰文正
敞言謚者有司之事也竦行邪而陛下謚之以正不應
法疏三上仁宗為更竦謚曰文莊

探刺史情

職官分紀鄭澣為考功員外郎刺史有驅迫人吏上言

政績請刊石紀功者泮探得其情因以奏聞使巧迹盡
露人服其敏識

定京官考

唐穆宗即位召李渤為考功員外郎校定京官考不避
權倖皆行黜陟

務覈實才

唐王丘開元初遷考功員外郎時多請託進者冒濫歲
至數百人丘務覈實才議者謂自武后以來數十年來

錄精明無丘比

皆取名士

唐孫逖改考功員外郎取顏真卿李華蕭穎士趙驊等
皆海內名士

戶部尚書

歷代沿革周禮地官大司徒之職即其任也漢成帝
置尚書五人其三曰民曹主凡吏上書事魏文帝置
度支尚書寺吳有戶部晉有度支皆主筭也宋齊度

支尚書領度支金部倉部起部四曹後周置大司徒
卿一人如周禮之制隋開皇初改為民部唐永徽中
以廟諱改為戶部龍朔三年改為司元太常伯初戶
部居禮部之後自武后改置天地四時之官以戶部
為地官遂居禮部之前宋朝戶部判司事一人以兩
制已上充凡田產錢穀之政令皆歸三司使本曹但
受天下之土貢元會陳於庭而已至元豐改官制罷
三司歸戶部左右曹而三司之名始泯矣三司者謂

鹽鐵戶部度支是也

敷教

虞書帝曰契汝作司徒敬敷五教在寬

掌圖

周禮大司徒之職掌建邦土地之圖與其人民之教以

佐王安擾邦國

辨物

周禮以會土之法辨五地之物生

擾民

周禮司徒掌邦教敷五典擾兆民

父子並為

詩本序鄭武公父子並為司徒善於其職

兄弟素篤

梁書劉洽為御史中丞兄溉為左民尚書舊中丞不得入尚書下舍洽引服親不應有碍到省評決乃許入溉省亦以兄弟素篤不能相別也溉美風儀善容止所至

金上七人二一
卷四十一
以清白自修不好聲色

隱之清儉

晉吳隱之為度支尚書以竹蓬為屏風坐無氈席後遷中領軍清儉不改每月所得俸祿纔留身糧餘悉分賑親族

韓滉庶勤

唐代宗大歷六年以韓滉判度支自兵興以來所在賦歛無度倉庫出入無法國用虛耗滉為人庶勤精於簿

領作賦出入之法御下嚴急吏不敢欺

崔從風望

唐崔從字子入為戶部尚書為人嚴偉立朝稜稜有風望

善果風績

唐鄭善果兼民部尚書奉法持正風績顯於公卿間每奏事及侍立並令升殿與從兄元璠在其數時以為榮

利人救邊

晉杜預為度支尚書內以利人外以救邊備物置濟當
時之急者五十餘條

陳圖掛籍

唐張鷟文集設九土之綱維成四方之管轄班固申犬
牙之制疆場綺分應璩論馬齒之規井田鱗次戶標九
等具陳萬國之圖人有十倫並掛三年之籍

國計專掌

魏文帝置度支尚書專掌軍國支計明帝嗣位欲用安

平王孚為度支尚書顧問左右曰有兄風否答曰似兄
帝曰吾得司馬懿兄弟二人復何憂遂轉孚為度支

財用並歸

宋初除安壽為戶部尚書元祐元年門下侍郎司馬光
奏令戶部尚書兼領左右曹而舊三司財用事有在五
曹寺監者並歸戶部則利權歸一

何肩固辭

梁何肩為左民尚書後辭官歸隱於若邪山雲門寺勅

給白衣尚書祿盾固辭不受

景歷早拜

南史蔡景歷拜度支尚書舊式拜官在日午後景歷拜日適逢輿駕幸玄武觀在位皆侍宴帝恐景歷不與特令早拜其見重如此

杜預武庫

晉杜預為度支尚書在位七年損益萬幾不可勝計號曰杜武庫言其無所不有也

長孫義倉

隋長孫平開皇三年為度支尚書見天下州縣多懼水災百姓不給奏令民間每秋家出粟麥一石以下貧為差等儲之間里以備凶年名曰義倉

王琚內相

唐王琚佐明皇平內難為戶部尚書帝於琚眷委特異預大政事號曰內宰相

德玄舊臣

唐高宗以竇德玄舊臣自殿中少監為御史大夫一歲
中遷司元太常伯

杜暹展足

唐景雲中盧從愿為吏部侍郎注杜暹為鄭縣尉後暹
為戶部尚書盧自益州長史入朝杜立於上乃謂盧曰
選人定何如盧曰亦由僕藻鑑遂使明公展千里之足

李緯好鬚

唐太宗幸翠微宮授司農卿李緯為民部尚書房玄齡

時在京城留守會有自京師來者太宗問曰玄齡聞李
緯拜尚書如何對曰但云李緯好鬚更無他語太宗遽
改授洛州刺史或云改授太子詹事

已讓版使

佳話唐韋煥辭判戶郎歸謂甥姪曰已讓版使矣版使
謂戶部也

自謂忠臣

齊褚淵為司徒入朝以腰扇障面功曹劉祥曰作如此

舉止羞面見人太子宴朝臣右衛率沈文季與淵語相
失文季怒曰淵自謂忠臣不知死之日何面目見宋明帝

作會稽錄

宋李常為戶部尚書作元祐會稽錄三十卷

置裁省局

宋韓忠彥字師朴謚文定召為戶部尚書時元祐會計
錄初成入狹而用廣忠彥憂之因言斂節財用遂裁省
冗費置局於戶部

戶部侍郎

歷代沿革周官小司徒之職即其任也隋煬帝始置
民部侍郎唐因之後改為戶部侍郎龍朔二年改為
司元少常伯咸亨元年復為戶部侍郎宋制見下

右曹

宋戶部侍郎之職皆歸三司元豐官制行戶部始總邦
計置侍郎二員左曹五案謂戶口案賦稅案農田案檢
法案知雜案也右曹五案謂常平案免役案坑塲案檢

法案知雜案也左曹除陳安石右曹除李定紹興四年
七月詔戶部侍郎二員通治左右曹職事蘇轍再謝除
戶部侍郎表右曹之政本專賦役之煩近歲以來復益
金倉之舊下闕民力上計邦儲

左戶

唐戶部侍郎二員判使案者別為一署謂之左戶元和
後選舉華重宰相多由此進崔羣既相孟簡代為侍郎

綱條甚張

唐白居易除張平叔戶部侍郎制張平叔國之材臣也計能析秋毫吏畏如夏日司會逾月綱條甚張况師旅未息調食方急倚成取濟非爾而誰

譽望大喪

唐潘孟陽權知戶部侍郎詔馳驛江淮視財賦孟陽恃氣豪倨所至招金錢多補吏譽望大喪又孟陽為戶部年未四十其母謂曰以爾之才而位丞郎使吾憂之

素無學術

唐李林甫引蕭炅為戶部侍郎炅素無學嘗與嚴挺之言稱伏臘為伏獵挺之言於張九齡曰省中豈容有伏獵侍郎乎乃出炅刺岐州

獨無進獻

唐李絳為戶部侍郎憲宗問曰戶部比有進獻至卿獨無何也絳曰將戶部錢進入內藏是用官物以求結私恩也上嘉其直

叙戶口多少

唐太宗問侍郎盧承慶歷代戶口多少之數承慶叙夏已後迄於周隋皆有依據

議戶版利病

唐楊瑒為戶部侍郎帝召大臣議戶版瑒言利病甚詳帝歎賞之

選從人望

唐韓愈除崔羣為戶部制地官之職邦教是先必選國華以從人望具官崔羣體道履仁外和內敏清而容物

善不近名從容禮樂之間特達珪璋之表

喜見風儀

唐劉禹錫奉送李戶部侍郎自河南尹再除本官詩昔
年內署振雄辭今日東都結去思宮女猶傳洞簫賦國
人先錄衮衣詩華星却復文昌位別鶴重歸太乙池想
到金門侍通籍一時驚喜見風儀

師文姻家

宋徽宗崇寧間蔡京當國始求羨餘以供侈費於是

其姻家胡師文為發運使以糴本數百萬緡充貢入為戶部侍郎自是繼者效尤時有進獻而本錢竭矣

趙瞻舊德

宋蘇軾作太常少卿趙瞻可戶部侍郎誥具官趙瞻明於吏事輔以經術忠義之節白首不衰今日秩宗擢貳邦計將使四方之人知予以耆老舊德居此官者蓋有盡徹之意焉

所獻精英

唐天寶中楊貴妃有寵每乘馬高力士執轡授鞭織繡
之工專供貴妃院者七百人中外爭獻珍玩嶺南經略
使張九章與王翼所獻精英九章加三品翼為戶部侍
郎

北除平緩

宋元祐初用治平故事命大臣薦士試館職一時名士
在館率論資考次遷轉未有越次進用者皆有滯留之
嘆張文潛晁無咎俱在其間一日二人閱朝報見蘇子

由自中書舍人除戶部侍郎無咎以為平緩曰子由此除不離核謂如果之粘核者文潛曰豈不勝汝枝乾乎聞者大笑按東北方有果如李每熟不待摘輒便槁土人因取藏之故謂之枝頭乾

賄賂不受

唐牛僧孺拜戶部侍郎初韓弘入朝父子俱卒諸孤幼小穆宗命中使閱其宅簿以付家老而簿中具納賂之事唯於僧孺官側朱書曰某月日送牛侍郎物若干不

受穆宗按簿甚悅居無何議命相帝首可僧孺之名

經總非長

王彥威開成初為戶部侍郎判度支威於儒術該邃亦善吏事但經總財用出入米鹽非所長也

條奏利害

唐李元紘歷工兵吏三侍上令宰臣及公卿以上精擇堪為戶部者多有薦元紘者及拜戶部侍郎元紘因條奏人間利害及時議得失上大悅因賜衣一副

執奏宣索

宋柳約字元禮權戶部侍郎感激奮勵悉力盡言凡例外宣索皆執奏以進

諫罷河議

宋元祐五年主議者執開河減水之策戶部侍郎蘇轍上疏諫曰臣為右曹戶部休戚計在此河若復緘默誰當言者惟斷在聖心盡罷其議

務均財用

朱晦庵與鍾戶部侍郎書比來同安跼伏簿書塵土中
乃聞執事復為天子出使巴蜀弛去逋負緡錢之在官
者以數百巨萬計弭節來還天子嘉之下所議奏於四
方擢執事攝貳版曹務以均節財用便安元元為職除
目既聞四方幽顯無不喜悅

戶部郎中

附員外

歷代沿革周官司徒之屬有下大夫即戶部郎中之
任也漢尚書郎一人主戶口懇田吳有戶曹郎魏有

左民部郎曹晉魚右民部郎曹東晉而下有民部郎曹
梁陳為左右郎後魏為左戶曹郎北齊有左右民曹
郎隋初置侍郎二人煬帝除侍字改民部郎唐為郎
中龍朔中改為司元大夫後復改郎中員外郎各二
人掌戶口土田賦役貢獻優復婚姻繼嗣之事又周
官大司徒之屬有上士蓋今戶部員外郎之任隋開
皇中置民部員外郎煬帝改民曹承務郎唐改戶部
員外郎貞觀咸亨龍朔光宅神龍並隨曹改復員外

卷四十八
郎二人掌領天下州縣戶口之事

詞理愜當

隋書高構轉民部郎中時有叔姪爭嫡尚書省不能斷
朝臣之議不決構斷而合理上以為能勞之曰我聞尚
書郎上應列宿觀卿才識方之古人信矣嫡庶者禮義
之所重我讀卿判數遍詞理愜當意所不能及也賜米
百石由是知名

氣岸高雅

唐武儒衡遷戶部郎中氣岸高雅論事有風采時皇甫
鎛以宰相領度支剝下益上儒衡上疏論列

為考堂

唐張博濟為戶部郎中部有考堂乃天下歲會計處博
濟廢為郎中員外廳事別取都水監地為考堂

修牢盆

劉禹錫作崔公倕碑公檢校戶部郎中幹池鹽于蒲修
牢盆謹衡石煎和既精飴散乃盈商通而薦至吏懼而

循法民不絀網而國用益饒詔褒其能

韋維裁剖

唐韋維字文紀為戶部郎中善裁剖時員外郎宋之問善詩故稱戶部二妙又維為郎中嘗蒔柳于庭及虛心兄弟居郎省對之歛容按虛心字元逸維之子也

王質方雅

唐劉禹錫撰神道碑王質字華卿為戶部郎中以方雅特立除諫議大夫

世尚儒學

宋淳化中戶部郎中張郁父正仕至戶部侍郎世尚儒學號書樓張家

夙有詩名

唐盧綸字允言河中人為戶部郎中夙有詩名貞元中與李端司空曙之徒名為十才子形於圖畫以美其名

賞其俊拔

已下員外

唐新語戶部與吏部鄰司時吏部移牒令戶部於墻宇

列棘以防令史交通呂太乙為戶部員外郎答曰春彼
吏部銓總之司當須簡要清通何必設籬種棘省中賞
其俊拔

聞其理行

唐裴向為滑南縣令奏議第一朝廷聞其理行擢為戶
部員外郎

度支郎中

附員外

歷代沿革漢有度支侍郎即郎中之任也魏晉宋齊

後魏北齊並有度支郎中唐龍朔二年改為司度大夫咸亨元年復舊掌支度國用租賦多寡之數物產豐約之宜每歲計其所出而支其所用宋設度支判司事一人列六案以無職事朝官充本司無所掌元豐官制行郎中員外郎始實行本事

梁公自職

唐職林狄梁公以度支之司繫天下利害部常闕人求之未得乃自職之

陳向叅掌

宋朝凡度支之政皆歸三司本司無所掌元豐官制行
郎中員外郎始實行本司事初除陳向叅掌計度天下
之經費以貢賦租稅之入而為之出小事則擬畫大事
則諮其長

位叅職綰

唐張鷟集位叅計會職綰度支

稱奇播美

張鷟集鳴鶴登朝含雞伏省轉筋之敏未見稱竒聚米
之能無聞播美張蒼之善笑國用詐肯留情馮勤之力
計軍儲曾何介意西京雜記曹元理善笑回筋知二國
之粟不差升斗也

副知首立

唐蘇弁授度支郎中副知度支事仍命立於正郎之首
戶有副知之名自蘇弁始也

對唱無差

唐崔仁師為度支郎中嘗奏度支財物數千言手不執
本太宗恠之令杜正倫齋本與仁師對唱一無差殊帝
大奇之

理究

張仲方少朗秀父友高郢見而奇之曰此子非常必為
國器後為金州刺史郡人有田產為中人所奪仲方三
疏奏聞竟理其寃入為度支郎中

責貢

唐貞觀中勅下度支求杜若省郎以謝朓詩芳洲采杜若乃責方州貢之本曹官云州不出杜若應由謝朓詩誤耳華省名郎乃如此判事豈不畏二十八宿笑人耶

獻餌

已下員外

唐張濬累轉度支員外郎黃巢將通關軸濬託疾請告侍其母挈族避亂商州賊犯京師僖宗出幸逾年供須衛軍不得食濬陰令李康獻糗餌數百勞軍士始得食僖宗召康問曰卿為縣令安操心至此康對曰臣為塵

吏敢有此進獻張濟員外指臣也帝異之急召至行在
拜兵部郎中

判案

唐故事度支案郎中判入員外判出侍郎總領押案而
已

金部郎中

歷代沿革漢尚書郎四人其一主財帛委輸蓋金部
郎中之任也歷魏晉宋齊後魏北齊並有金部郎梁

陳隋為侍郎煬帝但曰郎唐武德中加中字龍朔中
為司珍大夫咸亨復舊天寶改司金郎中至德復舊
宋設判金部司事一人以無職事朝官充凡庫藏出
納皆歸三司而權衡度量主於府寺本司無所掌元
豐官制行郎中員外始實行本司事

職金

周禮職金掌凡金玉錫石丹青之戒令

司珍

見沿革

無愧幽明

隋盧昌衡為祖孝徵所薦遷金部郎孝徵曰吾薦盧子均為尚書郎自謂無愧幽明矣

通知盈縮

中興繫年錄宋徐宗說在度支會右曹金部皆闕官因令兼領三曹宗說素有心計於天下經費出入盈縮之數莫不通知老吏為之斂手

令條治道

宋王師愈召除金部郎中數言事孝宗賜書曰比來奏對頗及治道之具而未詳也尚有可裨政體而宜於今者亟復條奏其眷待之渥一時在廷之臣莫敢望焉

止督緡錢

金部尚書楊俛取諸郡積逋緡錢七百萬付金部郎王師愈使督之公曰此錢徒有其名耳督之未必得而文移一下所擾者不知幾何人且中外一體若邦計未裕

不若歸誠君父以幸寬免豈宜舉此虛籍以罔上而病民耶持其事不下

倉部郎中

歷代沿革周廩人倉人之職也魏晉而下有倉部郎中梁陳為侍郎宋齊以度支尚書領之後魏有太倉尚書後周有司倉下大夫隋初制倉部侍郎煬帝止曰倉部郎唐武德三年加中字龍朔二年改司廩大夫咸亨復舊天寶為司儲郎中宋設倉部判司事一

人以無職事官充凡受納租稅出給祿廩之事皆歸
三司而別置提點倉場官以督察本司

掌出納

唐倉部郎中掌天儲庫出納租稅祿糧倉廩之事

掌給受

宋倉部叅掌國之倉場儲積及其給受之事列案有六
恬然無言

唐畢誠字存之為李德裕所忌累官駕部員外倉部郎

中故事要家勢人多以倉駕二部為辱畢誠恬然無言
如處美官宰相知之遷職方郎中兼侍御史知雜

疑然不附

唐孟簡為倉部員外郎王叔文為戶部侍郎簡為其屬
正色中臣疑然不附

山堂肆考卷四十八